

**Uunga siunnersuut: Utoqqalinersiaqarneq pillugu Inatsisartut inatsisaata aamma  
Siusinaartumik pensionisiat pillugit Inatsisartut inatsisaata allangortinneqarnerat  
pillugu Inatsisartut inatsisaat**

*(Isumaginninnermut Sulisoqarnermullu Naalakkersuisoq)*

pillugu

**Ilaqtariinnermut Peqqissutsimullu Ataatsimiititaliap**

**siunnersuutip aappassaaneerreqarneranut**

**ISUMALIUTISSIISSUTAA**

Ataatsimiititaliaq suliarinninnermini uku ilaasortarai:

Inatsisartunut ilaasortaq Agathe Fontain, Inuit Ataqatigiit, siulittaasoq  
Inatsisartunut ilaasortaq Anna Wangenheim, Demokraatit, siulittaasup tullia  
Inatsisartunut ilaasortaq Mikivsuk Thomassen, Inuit Ataqatigiit  
Inatsisartunut ilaasortaq Knus Mathiassen, Inuit Ataqatigiit  
Inatsisartunut ilaasortaq Mette Arqe-Hammeken, Naleraq  
Inatsisartunut ilaasortaq Jess Svane, Siumut  
Inatsisartunut ilaasortaq Mala Høy Kukó, Siumut

UKA2021-imi septemberip 30.-ani siullermeerinerup kingorna siunnersuut ataatsimiititaliap misissorpaa.

**Siunnersuutip imarisaa siunertaalu**

Utoqqalinersiaqarneq pillugu Inatsisartut inatsisaat nr. 20, 23. november 2015-meersoq aamma siusinaartumik pensionisiat pillugit allannguutit inatsisini pineqarput, allannguutit 2018-imut aamma 2021-imut aningaasanut inatsimmi oqaasertaliussat kingunerisaannik akuersissutigineqareersut matumani pineqarput, allannguutissatut siunnersuutini inatsisini taakkunani marlunni oqaasertaanut naleqqussaanertut oqaatigineqartariaqarluni.

Utoqqalinersiat pillugit inatsimmi allangortinneqartumi siullermi pineqarput, innuttaasut 65-ileereersimasut minnerpaamik ukiuni 35-ini sulisimasut oqimaatsunik suliaqarsimanertik pissutigalugu timimikkut tarnimikkulluunniit nungullarsimasut siusinaartumik

utoqqalinersiaqalernissaat, taannalu 2021-imut Aningaasanut inatsimmi malittarisassanut ilanngunneqareerpoq.

Inatsisip allangortinneqartup aappaani pineqarpoq akigititanik nalimmassaaneq siumut isigisumik akigititat naleqqussarneqarnissaannut procenti tunngavigalugu iluarsiivigineqartalernissaat nalimmassaanermut nalunaarsuut atornagu.

### **Siunnersuutip Inatsisartunit siullermeerneqarnera**

Siunnersuut tapersorsorluarneqarpoq, innuttaasulli pensionisiamit saniatigut isertitaqarnissamut periarfissaqartariaqarnerat aammalu ukiuni 35-ni sulisimanissaq pillugu malittarisassat oqallisigineqangaatsiarput.

### **Tusarniaanermut akissuteqaat**

Tusarniaanermut akissuteqaatit tunniunneqartut inatsisissatut siunnersuummut ilanngussatut ilanngunneqarput, taamaalilluni Inatsisartut Siulittaasoqarfiata ilusiliinissamut piumasqaataanut naapertuullutik.

Siunnersuut illuatungeriinnut susassaqtunut tusarniutigineqarsimanera inatsisissatullu siunnersuutip saqqummiunneqannginnerani oqaaseqaatit attuumassuteqartut arlallit ilanngunneqarsimaneri naammagisimaarlugu ataatsimiititaliamit maluginiarneqarpoq.

### **Ataatsimiititaliap siunnersuummik suliarinninnera**

Ilaqutariinnermut Peqqissutsimullu Ataatsimiititaliaq, Isumaginninnermut Suliffeqarnermullu Naalakkersuisumik paasissutissiilluni ataatsimeeqateqarpoq, tassungalu atatillugu siunnersuut pillugu paasissutissanik annertunerusunik utoqqarnullu tunngasuni pilersaarutit pillugit pissarsilluni. Tamatuma saniatigut immikkoortup inersuarmi siullermeerneqarnerani apeqqutinut saqqummiunneqartunut akissuteqaatit pillugit ataatsimiititaliaq allakkat assilineqarneratigut ilisimatinneqarpoq (takuuk ilanngussa).

### **Siunnersuutip aningaasatigut kingunerisassai**

Siunnersuutip piviusunngortinneqarneratigut aningaasatigut kingunerisassai siunnersuummi nalinginnaasumik oqaaseqaatini allaaserineqarput. Matumani allassimavoq, aningaasartuutissat 2021-imut aningaasanut inatsimmut ilaasutut akuersissutigineqareersimasut, siunnersuullu namminerisamik aningaasartuuteqarfiunani. Saqqummiunneqartut tunngavigalugit allatut naliliinissaminut ataatsimiititaliaq pissutissaqanngilaq.

### **Ataatsimiititaliap inassuteqaatai**

- Siunnersuut akuerineqassasoq ataatsimiititaliap isumaqatigiittup inassutigaa
- Inatsit nutaaq qanoq paasineqassanersoq pillugu peqqissaarussamik ilitsersuummik

Naalackersuisut kommuninut qulakkeerinneqataanissaannik ataatsimiititaliap isumaqatigiittup kaammattuutigaa, pingaartumik sullissinerup nukittorsarneqarnissaa eqqarsaatigalugu nungullarsarsimanagerup kingunerisaanik aammalu ukiuni 35-ini sulisimanissaq pillugu malittarisassat naapertorlugit siusinaartumik pensionernissaq qinnutigineqartillugu. Matumani ilaatigut sullissinerup sivisuallaannginnissaa qulakkeerniarlugu aammali pineqartunut qinnuteqaatit piginnaanngorsarnermilu suliat taputartuunneqannginniassammata.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappasaaniigassanngortippaa.

  
Anna Wangenheim

Navn  
Siulittaasup tullia

Knud Mathiassen

Jess Svane

Agathe Fontain  


Navn  
Siulittaasog

Mikivuk Thomassen  


Mette-Argé Hammeken

Mala Høy Kuko  




Jess Svane  
Siumut

06-10-2021  
Suliap nr. 2020 - 24290  
Akt. id. 18110368

Postboks 970  
3900 Nuuk  
Tlf (+299) 34 50 00  
Fax (+299) 34 63 64  
E-mail: isn@nanoq.gl  
www.naalakkersuisut.gl

**Siusinaartumik utoqqalinersiaqarnermut atatillugu sulianik isumaginninnermi piffissat atorpeqartartut pillugit ilisimatitsissut.**

Asasara Jess Svane,

Inatsisartut inatsisaata allanngortinneqarnerat pillugu Inatsisartut inatsisissaata imm. 121-p siullermeerlugu oqaluuserineqarneranut atatillugu siusinaartumik utoqqalinersiaqarnermut atatillugu sulianik isumaginninnermi piffissat atorpeqartartut pillugit apeqquteqarputit. Apeqqutip Ilaqutariinnut Peqqissutsimullu Ataatsimiititaliamut akineqartussanngorlugu suliarineqarnissaa kissaatigivat.

Siusinaartumik utoqqalinersiaqarnermut atatillugu sulianik isumaginninnermi piffissat atorpeqartartut allanngutissatut siunnersuummut ilaatinneqanngillat, taamaattumik allakkatigut ilisimatinneqarlutit akineqarputit.

Isumaginninnermut, Ilaqutariinnermut Inatsisinillu Atuutsitsinnermut Pisortaqarfiusimasup siusinaartumik utoqqalinersiaqartut pillugit suliassaqaarfimmik nalilersuineranut atatillugu nakkutilliinnermut nalunaarusiamik suliartaqarpoq, tassani ilaatigut siusinaartumik utoqqalinersiaqalernissamut qinnuteqaatit suliarineqartarnerat oqaaseqaarfineqarluni:

Sulianik isumaginnittarnerup takutippaa suliaq nalinginnaasumik qaammatit arfinillit missaanni ingerlanneqartartoq. Tassunga pingaarnertut peqqutaavoq, suliap ingerlanerani immikkuualuttut ataasiakkaat akornanni sivilisuumik utaqqisoqartarnera.

Innuttaasoq sulilerseqqinneqassappat, taava suliaq nalinginnaasumik ukiup ataatsip ukiullu marluk imaluunniit sivilisunerusumik ingerlasinnaasarput. Tassunga peqqutaavoq, suliap tamarmiusup ingerlasarnera (taamaattumillu aamma utaqqisoqartarluni) sivilisunerusinnaasarami, kiisalu kommunit ilaasa sulilersitsiniaanermut sivilisuumik ingerlatsisarnerat. Tamakkua suliap ingerlanneqarneranni piffissamik tamakkiisumik atuinnermik sivilisuisarput.

Illoqarfinni Majoriap aammalu isumaginninnermut ingerlatsiviup suliassanik isumaginninnermut systemiisa akornanni oqaloqatigiittoqanngikkaangat suliap unittoorallarneranik allaat kinguneqarsinnaasarpoq.



Tassungá atatillugu isumaginninnerup iluani inatsisiliornerup nutarterneqarneranut atatillugu pisortat suliasanik isumaginninnermut atortagaasa systemit pitsanngorsarnissaannut suliniutit aallarnisarneqassapput. Taamaasilluni isumaginninnermi suliat nalinginnaasumik pitsaanerumumik naammassisaqarfiunerumillu ingerlanneqarsinnaalissapput.

Ilisimatitsissut Ilaqutariinnermut Peqqissutsimullu Ataatsimiititaliamut ilanngullugu nassiunneqarpoq.

Inussiarnersumik inuulluaqqusillunga

Mimi Karlsen





Siverth Karl Heilmann  
Atassut

06-10-2021  
Suliap nr. 2020 - 24290  
Akt. id. 18108470

Postboks 970  
3900 Nuuk  
Tlf. (+299) 34 50 00  
Fax (+299) 34 63 64  
E-mail: isn@nanoq.gl  
www.naalakkersuisut.gl

## **Utoqqalinersiaqartut saniatigut isertitaqarsinnaanerannut periarfissat pillugit ilisimatitsissut.**

Asasara Siverth Karl Heilmann,

Utoqqalinersiaqarneq pillugu Inatsisartut inatsisaata aammalu siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisissaata imm. 121-p siullermeerlugu oqaluuserineqarneranut atatillugu apeqqutigivat utoqqalinersiat saniatigut isertitaqarsinnaaneranut periarfissat suunersut. Apeqqutip Ilaqutariinnut Peqqissutsimullu Ataatsimiititaliamut akineqartussanngorlugu suliarineqarnissaa kissaatigivat. Utoqqalinersiaqartut saniatigut isertitaqarsinnaanerant allannguutissatut siunnersuummut ilaatinneqanngilaq, taamaattumik allakkatigut iisimatinneqarlutit akineqarputit.

Utoqqalinersiaqarneq pillugu maleruagassat utoqqalinersiaqarneq pillugu Inatsisartut inatsisaanni nr. 20, 23. november 2015-imeersumi kingusinnerusukkullu allannguuteqartumi nassaassaapput.

Utoqqalinersiaqartup aallaavittut tamakkiisumik utoqqalinersiaqartarpoq, taannalu imaqarluni tunngaviusumik utoqqalinersianik aammalu utoqqalinersianut tapimik.

Utoqqalinersiaqartoq taassumalu ilaatigut aapparisaq utoqqalinersiat saniatigut qaffasissumik isertitaqarsimagunik, taava utoqqalinersianut tapeq nalimmassaaffigineqassaaq. Apparisaq isertitai tunngaviusumik utoqqalinersianut sunniuteqartussaangillat, tassami tunngaviusumik utoqqalinersiat aatsaat nalimmassaaffigineqartarmata utoqqalinersiaqartoq nammineerluni, utoqqalinersiat saniatigut, qaffasissumik isertitaqartarpat.

Utoqqalinersiaqarneq pillugu Inatsisartut inatsisaata allanngortinneqarnera pillugu Inatsisartut inatsisaata nr. 24, 7. december 2015-imeersup akuersissutigineqarneratigut Inatsisartut utoqqalinersiani isertitat toqqamaviusut naatsorsorneqartarneranni aallaavigineqartassanngitsut aalajangerput, aammalu Nunani Avannarlerni isumaginninnikkut qularnaveeqqusiineq malillugu utoqqalinersiat pisassasut aalajangerneqarluni.

Utoqqalinersiaqarneq pillugu Inatsisartut inatsisaata allanngortinneqarnera pillugu Inatsisartut inatsisaata nr. 35, 28. november 2019-meersup akuersissutigineqarneratigut utoqqalinersiat qaqugukkat nalimmassaaffigi-




neqarnissaannut isertitanut killissarititaasut qaffanneqarput. Taamaasilluni utoqqalinersiat nalimmassaaffigineqarneranni kisitsisit killigitinneqartut atuuttut ukuulerlutik:

Tunngaviusumik isertitat 383.666 kr.-iniit aallartittumik nalimmassaaffigineqartarput, aammalu tunngaviusumik utoqqalinersiat 544.263 kr.-inik isertitaqarnermi atorunnaartarlutik.

Utoqqalinersialinnut kisermaanut tapit 156.000 kr.-iniit nalimmassaaffigineqalertarput, aammalu utoqqalinersianut tapit 383.666 kr.-inik isertitaqarsimagaanni atorunnaartarlutik. Aappariinnut utoqqalinersianut tapit katillugit 183.000 kr.-inik isertitaqarsimagaangata nalimmassaaffigineqalertarput, aammalu utoqqalinersianut tapit katillugit 300.000 kr.-inik isertitaqarsimagaangata atorunnaartarlutik, aapparisaq utoqqalinersiaqarnissaminut pisinnaatitaaffeqanngikkaangat. Aapparisaq aamma utoqqalinersiaqalersinnaappat, katillugit 384.327 kr.-inik isertitaqarsimagaanni utoqqalinersianut tapit atorunnaartarlutik.

Ilisimatitsissut Ilaqutariinnermut Peqqissutsimullu Ataatsimiititaliamut ilanngullugu nassiunneqarpoq.

Inussiarnersumik inuulluaqqusillunga



Mimi Karlsen